



PM G20 Summit

प्रधानमंत्री नरेन्द्र मोदी होर अज्ज ब्राजील दे शैहर रियो डी जेनेरियो च लगा करदे जी-20 शिखर सम्मेलन च हिस्सा लैडन। मेद ऐ जे श्री मोदी होर इस शिखर सम्मेलन थमां बक्ख-बाहरें दुनिया दे बड्डे नेताएं कन्नै बक्खरे-बक्खरे बैठकां बी लाडन। प्रधानमंत्री मोदी, अमरीका दे राष्ट्रपति जो बाईडन ते चीन दे राष्ट्रपति शी जिनपिंग होर ओकड़े प्रमुख नेताएं दी सूची च शामिल न जेहड़े अज्ज ते कल बी रियो डी जेनेरियो च लगौ करदे जी-20 शिखर सम्मेलन च हिस्सा लैडन। ब्राजील ते दक्खन अफ्रीका सने भारत जी20 ट्रोइका दा हिस्सा ऐ ते ओह ऐल्लै जारी जी20 शिखर सम्मेलन दिऐ चर्चाएं च बी बड़ी सक्रियता कन्नै हिस्सेदारी जकीनी बनाऽ करदा ऐ। जी-20 शिखर सम्मेलन दुरान प्रधानमंत्री मोदी होर आलमी सतह दे बक्ख-बक्ख मुद्दें पर भारत दी स्थिति पेश करने दे कन्नो-कन्नी नमीं दिल्ली च आयोजित जी-20 शिखर सम्मेलन च जारी घोषणा पत्तर दे नतीजें ते हाल दे ब'रें च भारत आसेआ आयोजित वाईस ऑफ द ग्लोबल साउथ शिखर सम्मेलन दे नतीजें पर चर्चा करडन। पिछले ब'रे सितम्बर म्हीने, भारत नै नमीं दिल्ली च जी-20 शिखर सम्मेलन दी बड़ी कामयाबी कन्नै मेजबानी कीती ही जित्थे उन्नै दुनिया भरै दे बड्डे नेताएं गी नमीं दिल्ली घोषणा पत्तर च रूस-यूक्रेन जंग दे मुद्दे गी शामिल करने लेई आम सैहमति बनाइयै इक बड्डी कूटनीतिक जित्त हासल कीती ही।



LG Security Meet

लेफ्टिनेंट गवर्नर मनोज सिन्हा होरें कल जम्मू संभाग दे सिविल ते पुलिस विभाग दे वरिष्ठ अधिकारिऐं, डिप्टी कमिशनरें ते एसएसपीऐं दी इक उच्ची सतह दी बैठक लाइयै खित्ते च जारी विकास परियोजनाएं दी स्थिति ते सुरक्षा हालात दा जायजा लैता। आकाशवाणी दे जम्मू संवाददाता दी रिपोर्ट मुजब, एलजी होरें आखेआ जे आपू'चै तालमेल बनाइयै कम्म

करदे होई असें'गी इस गल्लै गी जकीनी बनाना लोड़चदा ऐ जे आतंकवाद ते उनें'गी समर्थन देने आहले तंत्र दा समूलचा नास कीता जाई सकै। उनें अधिकारिएं गी आखेआ जे जिसलै तगर आतंकवाद गी जड़ थमां खत्म नेई करी दित्ता जंदा उसलै तकर ओह् अराम कन्नै नेई बौहन। श्री सिन्हा होरें परियोजनाएं दी अमल-आवरी दी लगातार निगरानी करने ते तेजिआ कन्नै ढांचागत विकास जकीनी बनाने दी जरूरतै पर जोर पाया। उनें डिप्टी कमिशनरें गी निर्देश दित्ता जे ओह् आम लोकें तोहड़ी पुज्ज बनाने आहले कार्यक्रमें दा दायरा बधाने ते 100 फीसद योग्य लोकें गी सरकारी योजनाएं दे दायरे हेठ आहनने लेई व्यापक उपाऽ करन। उनें आखेआ जे राई-बाई खेत्तर दे विकास ते इक जिला इक उत्पाद ज्नेई पैहलकदमिएं गी होर अगगे बधाने बक्खी टकोहदा ध्यान दित्ता जाना लोड़चदा ऐ तांजे मते शा मते लोकें गी इंदा लाह हासल होई सकै।

<><><><><><>

National Agriculture Summit

शेरे कश्मीर कृषि विकास ते प्रौद्योगिकी विश्वविद्यालय यानि स्कॉस्ट जम्मू, च'ऊं दिनें दे राश्ट्री राई-बाई शिखर सम्मेलन 2024 दी मेजबानी करन जा'रदा ऐ। इस बड़्दे कार्यक्रम दा आयोजन 20 थमां 23 नवम्बर तगर कीता जाह्ग। इस सम्मेलन दा आयोजन राई-बाई उत्पादन ते करसान कल्याण मैहकमे दे बागवानी, पशुपालन, भिड़्ड पालन ते होरनें बक्ख-बक्ख मैहकमे कन्नै रलियै कीता जा'रदा ऐ। इस शिखर सम्मेलन दा विशे-सार ऐ "राई-बाई ते विज्ञान दे खेत्तर च नमिएं काह्डें दा इस्तेमाल"। इस पैहलकदमी दा मकसद करसाने गी नमियां तकनीकां उपलब्ध करोआना ते उत्पादन दे खेत्तर च सुधार आहनना ते कन्नै आलमी सतह दिएं राई-बाई चुनौतिएं दे अनुकूल बनने गितै उनें'गी राई-बाई दे कम्मै च बरतोने आहले संदरें कन्नै लैस बनाना ऐ। इस कार्यक्रम च बड़ी मती गिनतरी च करसान, नौजवान, महिलां, स्टार्टअप ते राई-बाई उद्यमिएं सने शोधकर्ता, विद्यार्थी, पशु मालक, उद्योगपति ते सरकारी ते गैर सरकारी संगठन बी हिस्सा लैडन। जम्मू कश्मीर, पंजाब, हिमाचल प्रदेश, हरियाणा, उत्तराखंड ते लद्दाख थमां तकरीबन 15 ज्हार प्रतिभागिएं दे इस शिखर सम्मेलन च हिस्सा लैने दी मेद ऐ ते एह् सम्मेलन राई-बाई खेत्तर च इक बड़्डी गैह साबत होग।

<><><><><><>

Dr. Jitendra Machail

केन्द्री मंत्री डॉ. जितेन्द्र सिंह होरें आखेआ ऐ जे जम्मू कश्मीर दे किश्तवाड़ जिले दे मचेल ग्रां गी प्रधानमंत्री सूर्य घर मुफ्त बिजली योजना तैह्त्त सौर ऊर्जा कन्नै जोड़ने दा प्रस्ताऽ कीता गेआ ऐ। डाक्टर सिंह होरें सोशल मीडिया मंच 'एक्स' पर लिखेआ ऐ जे मचेल तैह्सील, सब-डिवीजन पाड्डर दे अधिकार खेत्तर आहले इलाके हेठ औंदी ऐ जिसी प्रधानमंत्री सूर्य घर मुफ्त बिजली योजना तैह्त्त सौर ऊर्जा कन्नै जोड़ने दा प्रस्ताऽ ऐ ते किश्तवाड़ दे डिप्टी कमीशनर राजेश कुमार होर इस मामले गी सरगर्मी कन्नै अगगे बधाऽ करदे न। ध्यानजोग ऐ जे इस ब'रे 5 सितम्बर गी सम्पन्न होई दी श्री मचेल माता जी दी सलाना जात्तरा च 2 लक्ख 80 ज्हार श्रद्धालुएं मत्था टेकेआ ऐ।

<><><><><><>

Army Recruitment Rally

जम्मू कश्मीर दे बन्ने आले जिले पुंछ च 5एं ब'रें दे वक्फे परैंत फौज आस्सेआ करोआई गेदी भर्ती रैली च 26 ज्हार शा मते नौजवानें हिस्सा लैता। टेरिटोरियल आर्मी च सोल्जर जनरल ड्यूटी दिएं 307 असामिएं ते क्लर्क ते होरनें शोबें लेई 45 असामिएं गी पुर करने गितै एह रैली जंदी 8 नवम्बर गी सुरनकोट आहली एडवांस लैंडिंग ग्राउंड च आयोजित कीती गई ही। जम्मू संभाग दे जम्मू, पुंछ, राजौरी ते रियासी सनें 31एं तैह्सीलें दे नौजवानें सोल्जर जनरल ड्यूटी लेई जदके समूलचे जम्मू कश्मीर थमां नौजवानें क्लर्क ते होरनें असामिएं लेई इस रैली च हिस्सा लैता। तकरीबन 4 ज्हार मेदवारें ग्राउंड टैस्ट पास कीता ते हुन ओह् मैडिकल जांच आली परीक्षा देंगन। मकामी लोकें इस रैली दे आयोजन लेई फौज दा आभार जताया ऐ।

<><><><><><>

Goa - IFFI

भारत सरकार दे सूचना ते प्रसारण मंत्रालय दे राष्ट्री फिल्म विकास निगम — एन.एफ.डी.सी. आसेआ मनोरंजन सोसायटी गोवा दे सैहयोग कन्नै औंदी 20 थमां 28 नवंबर 2024 थमां गोवा च 55में भारती अंतर्राष्ट्री फिल्म उत्सव दा सरिस्ता कीता जा'रदा ऐ। आकाशवाणी जम्मू संवाददाता दी रिपोर्ट मूजब एह फिल्म उत्सव पणजी च लग्गोग ते इस ब'रे एह्दा विशे—सार

ऐ 'युवा फिल्मकार'। इस ब'रे Best Debut Director of Indian Feature Film आहली इक नमीं पुरस्कार श्रेणी बी रक्खी जाहग जेह्दे तैह्ते 5 लक्ख रपें दा नकद ईनाम ते इक प्रमाण पत्र भेंट कीता जाहग। एह्दा मकसद भारत दे युवा हुनर गी बढ़ावा देना ऐ। इस दौरान 81 मुल्खें दियां 180 अंतराष्ट्री फिल्मां दस्सियां जाडन जिंदे च 15 World Premieres शामिल होडन।

<><><><><><>